

Cosmographie Vniuerselle

Le mer de la Floride.
mares iusques à cest endroit, la coste est sablonneuse : & commence à s'estendre en mer, iusques au cap de la Floride, b'ayant du Nordest quart de Nord, & incontinent au Suest, quart du Su. Ayant trauiersé ceste terre en peu d'heures, vous apparoit la Baye Marquile, & celle d'Honde: puis port Reparé, la riuere des Perles, & Port bas, en la mesme haulteur que ledit Cap, sçauoir à deux cens nonante huit degrez de longitude, vingt six degrez de latitude. Suivant tousiours la coste, vous venez à cap de Canaue, puis à celuy de Corinthe : & de là a la riuere Iourdain, qui gist a trois cens vn degre de longitude, trête deux degrez trente minutes de latitude, esloignee de la pointe de la Floride, faite en Peninsule, & l'vne des longues de ceste coste, de sept vingtz trois lieues ou enuiron. Ayant doublé plusieurs Illetes, l'abordage desquelles est dangereux au possible, principalement aux grands vaisseaux, à cause que la sonde ny vault rien, parquoy tirez auant en mer: mais si auez vent contraire de la part de l'Est, vous pouuez aller mouiller l'anchre au Port de Mallabrit, ou bien au cap de la Trauerse, qui gist sur les trois cens trois degrez quinze minutes de longitude, trente trois degrez quatre minutes de latitude : & sont distants l'vn d'avec l'autre de quelque vingt six lieues. Quant a la Baye sainte Marie, & aux Caps marquez dans nos Cartes marines de saint Iean, Double, & celuy des Arenes, ils sont sur les trois cens sept degrez de longitude, & trente huit de latitude: comme sont aussi le Goulfe grand, Montaignes vertes, (ainsi nommees d'autât que a la pointe d'un Cap, qui entre huit lieues en mer, apparoit de loing vne haulte montaigne est tousiours verdoiant) les riuieres de bonne Mere & de bonne veue, qui sont a trente cinq lieues l'vne de l'autre. Sortis que vous estes de ladicte riuere, pour prendre la route d'Espagne ou de la France, vous laissez ce cap des Isles, qui vous apparoit de huit lieues en mer: puis fil suruient quelque tourmête ou orage, vous pouuez venir mouiller l'anchre à la riuere de Norombegue, à l'entree de laquelle vous apparoit vne Ile de laquelle ailleurs ie vous ay parlé, & des dangers qu'il auoisinent : & gist sur les trois cens vnze degrez cinquante minutes de longitude, quarante deux degrez quatorze minutes de latitude : & est esloignee de celle de bonne veue, de trente sept lieues. Se presentent apres trois autres riuieres, l'vne nommee Plage, l'autre Inuide, & la troisieme d'Anordie, qui gisent en pareille haulteur, sçauoir sur les trois cens quatorze & quinze degrez de longitude, & quarante deux vnze minutes de latitude. Apres qu'auetz doublé la coste, & que changez de Rumb de vents, si tirez la part de l'Est, & que regardiez a lon opposite, vous apperceuez vne haulte montaigne, par laquelle les Pilotes congnoissent où ils sont sans prendre la haulteur du Soleil. Sillonnant tousiours la mer, comme si vouliez aller a l'Est, d'autant que la coste commence à ce courber, vous laissez la Baye aux Comtes, & celle de Pallee, & venez a la riuere de Baye, toutes trois sur les trois cens vingt quatre degrez de longitude, & quarante quatre degrez trente minutes de latitude : & de là il fault doubler les velles, & tirer droit au Nord, si voulez aborder le cap Breton: aupres duquel la mer est plus desbordée qu'en autre endroit, à cause qu'il est posé en l'emboucheure de la grande riuere de Canada : & gist ledit Cap, de tout temps congneu des François, pour la bonne pescherie qui s'y fait, & pour les huilles des Baleines qu'ils en apportet, sur les trois cens vingt sept degrez de longitude, quarante six degrez quarante deux minutes de latitude. Estans sortis de ce peril, tirez tousiours la part du Nord, pour les battures qui se presentent, & venez si voulez faire aiguade, au cap de Raze, qui est en la terre de Baccalcos : puis à celuy de Bonne veue : & apres à celuy de saint François : & gisent tous trois sur les trois cens trente quatre degrez de longitude, quarante huit de latitude. Et est en pareille